



РЕФЕРЕНДУМ-2024: ҚАЗАҚСТАН ХАЛҚЫ ӨЗ ТАҢДАУЫН ЖАСАДЫ

Еліміз өзінің тәуелсіздік тарихында жаңа кезеңге қадам басты. Бұл экономикалық та, қоғамдық та, энергетикалық та, тіпті ғылыми-технологиялық тұрғыда да ел дамуына серпін берген бастама болды. 6 қазан күні АЭС салу мәселесі жөніндегі жалпыұлттық референдумда Қазақстан халқы өз таңдауын жасады. Дауыс берген ел азаматтарының 71,12%-ы атом электр стансасын салуды жақтайтындарын білдірді.



номикалық өсім, қоғамдық оптимизм» атты Қазақстан халқына арнаған Жолдауында елімізде атом электр стансасын салу мәселесіне қатысты жалпыұлттық референдум биылғы жылдың 6 қазанында өтетінін жариялап, тиісті Жарлыққа қол қойған еді. Осыған орай 5 саяси партия мен 20-ға жуық республикалық қоғамдық бірлестіктердің 250-ге жуық өкілінен АЭС салуды қолдау жөніндегі Халықтық штаб құрылды. Альянсқа біріккен саяси ұйымдар – «AMANAT», ҚХП, «Ақ жол», «Ауыл» және «Байтақ» партиялары.

Анығын айтқанда, референдумға дайындық барысында басты салмақ АЭС салуды қолдау жөніндегі осы Халықтық штабқа түскені рас. Қоғам арасында қозғау салып, түрлі форматтағы пікірталастар ұйымдастырған олар еліміздің барлық 17 өңірінде, 3 мегаполисінде жұмыс істеді. Құрылымы бойынша Республикалық және өңірлік штабтар болып бөлінген ынталы топтың үгіт-насихат жұмыстарына барлық деңгейдегі депутаттар, министрліктердің мамандары, тәуелсіз сарапшылар, ел ағалары, партиялардың әйелдер канаты, жастар канаты, қоғам белсенділері кәсіпкерлер, жалпы барлық әлеуметтік топ өкілдері атсалысты. Олар бір ай бойы барлық өңірді, алыс аудан, ауылдарды аралап, еңбек ұжымдарымен, жастармен, зиялы қауым өкілдерімен, бұқара жұртшылықпен көптеген пікірталастар, кездесулер, қабылдаулар өткізді.

АЭС-ті КОНСОРЦИУМ САЛАДЫ

Бұған дейін де айтқанымыздай, АЭС салу мәселесі елімізде ең алғаш рет сонау 1997 жылы көтерілген болатын. Ол Ақтаудағы БН-350 реакторы әлі жұмыс істеп тұрған кез еді. Содан бері түрлі нұсқа ұсынылып, түрлі жоба қарастырылды. 2006 жылы ол Ақтаудағы МАЭК-тің базасында орналастырылатын болды. 2010 жылы Курчатовта салу жоспарланды. 2015 жылы Курчатов пен Үлкен елді мекендерінде салынатыны айтылды. 2017 жылы

МАГАТЭ-нің қабырғасында «Қазақстанда АЭС салу туралы шешім 2018 жылдың аяғына дейін нақты қабылданатын болады» деп мәлім етілді. Осылайша, соңғы нүктесі 2024 жылы 6 қазанда қойылды. Бұл АЭС салу туралы қоғамдық пікірдің ұзақ жылдар бойғы сан мың толғаныс пен пікірталас барысында пісіп-жетілген уақыты еді. Сондықтан да «Қазақстан қоғамы референдумға дауыс беруге моральды түрде дайын келді» деуге болады. Өз кезегінде Мемлекет басшысы мұндағы таңдауды қазақстандықтардың өзіне

берді. Тек көптің көкейінде тұрған бір сауал: «оны кімнің салатындығында» еді. Бұған референдум кезінде дауыс берген Қазақстан Республикасының Президенті Қасым-Жомарт Тоқаев өзіне тән парасатпен жауап берді.

«Бұл онай мәселе емес. Үкімет талдау жасап, тиісті келіссөздер жүргізуге тиіс. Менің пікірімше, Қазақстанда ең озық технологиялары бар әлемдік компаниялардан құралған халықаралық консорциум жұмыс істеуі қажет. Қалғанын уақыт көрсетеді», – деді Мемлекет басшысы.

Қасым-Жомарт Тоқаев Президент орталығында орналасқан №211 референдум учаскесіне барып өз таңдауын жасады. Одан кейін отандық бұқаралық ақпарат құралдарының өкілдері үшін брифинг өткізіп, көпті толғандырған сұрақтарға жауап берді.

ХАЛЫҚТЫҚ ШТАБ ХАЛЫҚ АРАСЫНДА

2 қыркүйек күні Президент Қасым-Жомарт Тоқаев өзінің «Әділетті Қазақстан: заң мен тәртіп, эко-

(Жалғасы 2-бетте)

АҚОРДА

ҚҰТТЫҚТАУ ЖЕДЕЛХАТЫН ЖОЛДАДЫ

Мемлекет басшысы Қасым-Жомарт Тоқаев Ресей Федерациясының Президенті Владимир Путиннің туған күніне орай құттықтау жеделхатын жолдады.

ӘЛЕУМЕТ

ҚАЗАНҒА ТҮСЕТІН ЕТ ҚАУІПСІЗ БЕ?

Базардағы етті менсінбей, оны тек дүкеннен алатын қалалықтар өзіне қауіп төнгенін біле бермейді. Базардан басқа барлық сауда орнында сатылатын еттің ветеринарлық бақылаудан өтпейтіні анықталды. Заңда ондай бақылау тек базарларға орнатылған. Мұны растаған салалық комитет ескі тәжірибені өзгертіп, бүкіл сауда нысанына ерекше мемлекеттік бақылау енгізу мәселесін пысықтап жатыр. Реформаның көздегені не?

→ 5



БҮГІНГІ НӨМІРДЕ:

БАТЫСТАҒЫ 119 АУЫЛ ҚҰДЫҚТАН СУ ІШІП ОТЫР

Президент Қасым-Жомарт Тоқаевтың «2025 жылдың соңына дейін еліміздің барлық қалалары мен ауылдарының тұрғындары таза ауызсумен қамтамасыз етілсін» деген тапсырмасының БҚО-да орындалуы баяу. Облыста таза ауызсу жетпеген 119 ауыл бар.



→ 7

«АДАЙДЫ» ӘУЕЛЕТКЕН ӘЛІБЕК

Көкше жерінің тумасы 26 жастағы Әлібек Қайырбектің есімі бір-ақ сәтте тұтас Қазнетке танымал болды. Әлемде тұңғыш рет қазақтың қара домбырасының күміс күмбірі мен үні қарт құрлықтың ең биік шыңының төбесінен әуелегені халықтың үлкен құрмет-қошеметіне бөленді.



→ 8

ҚОҚЫСҚА ТОЛҒАН ТӨРЕТАМ

Төретама кенті – Ресей жалдап отырған Байқоңыр қаласымен іргелес қоныстанған елді мекен. Жұлдызды қалашықпен жапсарлас қоныстанған осы ауыл халқы талай жылдан бері ғарыш айлағынан көкке самғаған зымырандардың зардабын өзгелерден бұрын сезініп келеді. Әсіресе, адам ағзасына зардабы зор зиянды қалдықтардан қалай құтыларын білмей, алаңдаушылықпен күн кешіп отыр.



→ 7

8 ҚАЗАН 2024 | СЕЙСЕНБІ

СТРАТЕГИЯЛЫҚ ӘРІПТЕСТІК ТУРАЛЫ КЕЛІСІМ ҚАРАЛАДЫ



Сенат Спикері Мәулен Әшімбаевтың төрағалығымен палата бюросының отырысы өтті. Онда депутаттар 10 қазан күні өтетін палата отырысының күн тәртібін бекітті және Сенаттың іс-шаралар жоспарын іске асыру аясындағы міндеттерді талқылады.

Сенат Төрағасы өз сөзінде елімізде өткен АЭС салу мәселесіне қатысты республикалық референдумның қорытындысына тоқталып өтті.

Мәулен Әшімбаев референдумға қазақстандықтардың белсенді қатысқанын тілге тиек етіп, бұл азаматтардың Мемлекет басшысының Әділетті Қазақстан қалыптастыру жолындағы барлық бастамасын қолдайтынын тағы да бір көрсетіп бергенін айтты. Сондай-ақ ол ел Президентінің референдум өткізу туралы шешімі мемлекеттің болашағы үшін аса маңызды қадам екеніне назар аударды.

Сонымен қатар бюро отырысында 8-9 қазан күндері Астанада өтетін Әлемдік және дәстүрлі діндер лидерлері съезі хатшылығының XXII отырысы мен I Жас діни лидерлердің форумына дайындық барысы пысықталды. Аталған іс-шараларға 19 елден келген 30 делегация өкілдері қатысады.

Бюро мүшелері осы аптада өтетін палата отырысының да күн тәртібін талқылады. Өткен аптада

Мемлекет басшысының Жарлығымен Марат Қожаев Сенат депутаты болып тағайындалған еді. Осыған байланысты жалпы отырыста ант беру, тұрақты комитетке мүше етіп сайлау сияқты ұйымдастыру мәселелері қаралады.

Бұдан басқа, Сенат отырысының күн тәртібіне «Қазақстан Республикасының Үкіметі мен Қатар мемлекетінің Үкіметі арасындағы басым салалардағы жобаларды дамыту үшін ұзақмерзімді стратегиялық әріптестік орнату туралы келісімді ратификациялау туралы» заң шығарылды.

Аталған заң нормалары екі елдің телекоммуникация, энергетика, мұнай-химия және басқа да салалардағы бірлескен жобаларын іске асыруға, сондай-ақ сауда-экономикалық ынтымақтастықты нығайтуға арналған.

Сондай-ақ бюро отырысында Мәжілістен келіп түскен заңдар жұмыс үшін тұрақты Комитеттерге бөлініп берілді.

АСТЫҚ ЭКСПОРТЫ АРТАДЫ



Үкіметте вице-премьер Серік Жұманғариннің төрағалығымен өткен егін жинау науқаны бойынша жедел штабта экспортқа астық жеткізуді ұлғайту мүмкіндіктері қаралды.

«КТЖ» ҰҚ» АҚ басқарушы директоры Бауыржан Орынбасаров биылғы 9 айда қазақстандық астық пен ұнды теміржолмен жеткізудің негізгі нарықтарын таныстырды. Астықты тиіп жөнелтудің жалпы көлемі 6,6 млн тоннаны құраса (былтырғы жылдың осы кезеңімен салыстырғанда 21%-ға аз), тартылған өнімдерді тасымалдау көлемі пропорционалды түрде өскен – 2,7 млн тонна (2023 жылдың 9 айымен салыстырғанда 21%-ға артық). 6,6 млн тонна астықтың 5 млн тоннасы экспортқа жіберілді, тек қыркүйекте ғана 900 мың тонна жөнелтілді. Тартылған өнімдердің экспорты 2,1 млн тоннаны құрады, оның ішінде – 310 мың тонна қыркүйек айына тиесілі.

«Қазақстанның астығы жеткізілетін негізгі елдер – Орталық Азия (2,9 млн тонна), Қытай (1,3 млн тонна), Ауғанстан (127 мың тонна), бұл биылғы 9 ай ішіндегі көлем. Салыстырмалы түрдегі тыныштықтан кейін Иранға 211 мың тонна астық жеткізу қайта жанданды, оның 140 мың тоннасы қыркүйек айына тиесілі. Басқа елдерге – Италияға,

Түркияға және Ресейге 423 мың тонна жөнелтілді. Негізгі елдерге қаңтар-қыркүйек айларында 495 мың тонна – Орталық Азияға, 639 мың тонна – Қытайға, 666 мың тонна – Ауғанстанға жөнелтілді», – деп хабарлады Бауыржан Орынбасаров.

Вице-премьердің айтуынша, біздің алдымызда биыл Қытайға 2 млн тонна астық жеткізу міндеті тұр, біз оның көлемін 3 млн тоннаға дейін арттыра аламыз.

«Сондай-ақ Ауғанстанға ұн жеткізуді ұлғайту қажет. Жаңа келісімшарттар мен логистика Алматыда өтетін Қазақстан–Ауғанстан бизнес-форумының басты мәселелерінің бірі болуға тиіс», – деді жедел штаб отырысының қорытындысында Серік Жұманғарин.

7 қазандағы жағдай бойынша Қазақстанда дәнді дақылдардың барлық алқабының 94%-ы, картоптың 90,5%-ы, көкөністердің 84,6%-ы, майлы дақылдардың 30%-ы, қант қызылшасының 23%-ы жиналды. Егін жинау науқаны басталғалы элеваторларға 4,4 млн тонна астық түсті.

ОРНЫҚТЫ ДАМУ ЖОЛЫНДАҒЫ МАҢЫЗДЫ ҚАДАМ

Ғұмарбек Дәукеев атындағы Алматы энергетика және байланыс университетінде елімізде АЭС салу туралы республикалық референдумның алдын ала қорытындыларын сараптамалық талқылау өтті.



Іс-шараға Орталық Азиядағы new Nuclear Watch Institute консультациялық кеңесінің төрағасы Бауыржан Ибраев, «AMANAT» партиясының Алматы қалалық филиалы төрағасының орынбасары Қуаныш Төлепов, сондай-ақ атом ғылыми саласындағы жетекші сарапшылар, профессор-оқытушылар құрамы және Студент жастардың өкілдері қатысты.

Кездесуде Орталық сайлау комиссиясы жариялаған референдумның алдын ала қорытындыларын талқыланды. Мәліметтерге сәйкес, азаматтардың 71,12 пайызы немесе 5 миллион 561 мың 937 адам атом электр стансының құрылысын қолдады.

«Атом электр стансының салу туралы референдум еліміздің энергетикалық тәуелсіздігі мен орнықты дамуы жолындағы маңызды қадам болды. Бүгінде азаматтардың 70 пайыздан астамы жобаға қолдау білдірген кезде, біздің алдымызда құрылысты бастау ғана емес, болашақта осы күрделі, бірақ қажетті инфрақұрылымды басқаратын жас мамандарды даярлау міндеті тұр. Жастар – Қазақстанның атом энергетикасының болашағы, ал университеттер осы салада жұмыс істеу үшін қажетті құзыреттерді қалыптастыруда шешуші рөл атқарады», – деп атап өтті «Қазақстанның ядролық қоғамы» қауымдастығына қарасты атом ғылымы, энергетика және өнеркәсіп ардагерлері кеңесінің төрағасы Бауыржан Ибраев.

Энергетика және жасыл технологиялар институтының директоры Айнұр Бегімбетова кадрлық әлеуеттің маңыздылығын атап өтті:

«АЭС пайдалануға берілген кезде жастар дайындалуы керек. Бүгінде атом ғылымы саласындағы мамандарды оқытуға ресурстарды инвестициялау қажет, бұл біздің ғылыми базамыздың дамуына оң әсер етеді. Ол үшін арнайы бағдарламаны әзірлеу қажет. Сондай-ақ студенттерді атом энергетикасы саласы белсенді дамып келе жатқан Оңтүстік Корея сияқты елдерге жіберу мүмкіндігі болуы керек. Онда жас мамандар озық технологиялармен танысады, содан кейін оларды бізге енгізеді».

Талқылау барысында референдум өткізу Қазақстандағы саяси мәдениет пен азаматтық қоғамның дамуындағы маңызды кезең болғандығы атап өтілді. Азаматтардың осы дауыс беруге қатысуы олардың негізгі мемлекеттік шешімдерге ықпал етуге дайын екенін көрсетеді және демократиялық институттарды нығайту жолындағы маңызды қадам болып саналады. Бұл процесс халықтың саяси белсенділігін дамытуға және азаматтық жауапкершілік деңгейін арттыруға ықпал етеді», – деп атап өтті «AMANAT» партиясы Алматы филиалы төрағасының орынбасары Қуаныш Төлепов.

АУҚЫМДЫ ЭКОАКЦИЯ БАСТАЛДЫ



АЭС салуды қолдау бойынша Халықтық штабтың белсенділері АЭС құрылысын қолдау науқаны аясында жапсырылған үгіт баспа материалдарын жинау бойынша ауқымды акцияны бастады.

Бір ай ішінде бүкіл ел бойынша Халықтық штаб еріктілері шамамен 1,5 миллион плакат жапсырған болатын. Енді қалалар мен елді мекендерді тазартатын уақыт та келіп жетті. Үгіт плакаттарын тазалау акциясы «AMANAT» партиясының «Таза бейсенбі» ауқымды акциясы аясында өтуде.

«Біздің еріктілер ақпараттық науқанға белсене қатысып қана қоймай, қазір де дәл осындай бұданаттылықпен қалалардың тазалығына қамқорлық жасауда. Біз бұл акцияны елдегі экологиялық жағдайды жақсартып қана қоймай, қоғамда тазалық пен жауапкершілік мәдениетін тәрбиелеуге бағытталған Президент Қасым-Жомарт Тоқаевтың «Таза Қазақстан» жалпұлттық баста-

масымен ұштастырамыз. Бүгінде осылайша қалаларымыз бен ауылдарымызда экологиялық тепе-теңдікті сақтауға өз үлесімізді қосудамыз», – деді «Жастар Рухы» төрағасы Агерке Искандерова.

Биылғы маусымнан бастап еріктілер 80-нен астам су нысанын, соның ішінде өзен-көлдер мен жағалау аймақтарын тазартты. Жалпы, бүкіл ел бойынша акцияда 7 мың тоннадан астам қоқыс жиналып, 50 мыңға жуық адам қатысты.

Айта кетейік, үгіт материалдарын жинау бастамасы жастардың қоғамдық жобаларды қолдауға деген ұмтылысын, олардың Қазақстанда экологиялық мәдениетті қалыптастырудағы белсенді ролін көрсетеді.

